

四庫全書

史部

欽定四庫全書

欽定宗室王公功績表傳卷四

傳二 親王

和碩睿親王多爾袞傳

多爾袞

太祖高皇帝第十四子初封貝勒天聰二年二月

上征察哈爾多羅特部大敗之數穆掄俘獲萬餘以多爾

袞從征有功

金史卷四
賜號墨爾根岱青三年十月從

上自龍井關入明邊與三貝勒莽古爾泰等攻漢兒莊降
之十一月先驅赴通州相視渡口捕哨卒從

上攻明北京敗寧遠巡撫袁崇煥錦州總兵祖大壽援兵
於廣渠門外十二月遇明山海關援兵於薊州殲
之四年二月

上自灤河旋蹕多爾袞與莽古爾泰先行破敵營斬級六
十獲馬八五年三月

命諸貝勒直言時政多爾袞奏曰讞獄重務凡任事諸臣
當悉心詳議不可苟且塞責七月初設六部

命掌吏部事八月從

上圍大凌河城明兵出誘戰多爾袞偕諸將衝入陣敵墮
壕死者百餘城上礮矢齊發我將士有陣沒者

上切責其從官曰定例遇敵時貝勒坐鎮軍中令諸將率
兵擊之今貝勒輕自進戰爾等何不阻止倘有疎失爾
等死不足蔽辜矣十月大壽以錦州降多爾袞與貝勒

阿巴泰等以兵四千隨大壽作潰奔狀城內兵分
路迎並為我軍擊敗事詳饒餘敏郡王傳六年五
月從

上征察哈爾與貝勒濟爾哈朗俘其部衆千餘於歸化城
西南黃河岸七年六月

詔問征明及朝鮮察哈爾三者何先奏言宜整兵馬乘穀
熟時入明邊圍北京截其援兵毀其屯保為久駐
計可坐待其敝也八年五月從

什達爾漢皆為我大臣遣宣

諭慰撫額哲遂奉其母率宰桑台吉等衆迎降時鄂爾多斯部濟農誘額哲往附既盟且行矣追留之諭盡返所攜察哈爾人衆不然即移兵討濟農懼盡送於軍六月師還渡河岳託率兵千衛降衆駐歸化城多爾袞與兩貝勒攜額哲及宰桑台吉等征明自平魯衛至朔州毀寧武關略代州忻州寧縣黑峯口及應州斬級六千餘俘獲無算仍由歸化城

攜降衆還察哈爾有元玉璽交龍紐鐫漢篆曰制
誥之寶順帝失之沙漠越二百餘年有牧山麓者
見羊不食草以蹄掘地發之乃璽歸於元裔博碩
克圖汗後為林丹汗所得至是多爾袞令額哲獻
於

上衆貝勒大臣以蒙古悉臣服且得前代璽表上

尊號事具穎毅親王傳崇德元年四月晉封和碩睿親王

八月

上以武英郡王阿濟格饒餘貝勒阿巴泰統師征明已越

北京

諭王同豫親王多鐸等征山海關以牽制明兵至錦州收
降城中士人胡有陞張紹禎門世文門世科秦永
福等聞武英郡王奏捷乃班師十二月從

上征朝鮮二年正月同肅親王豪格別從寬甸路入長山
口克昌州敗其兵於寧邊城下又以五十人追敗
其黃州援兵萬五千進攻江華島以紅衣礮擊潰

船四十乘勝入島殪伏兵千餘克其城獲朝鮮王妃及其二子國王李倬窮蹙乞降

上班師

命王約束後軍攜朝鮮質子李滢李湔及大臣子以還三年二月

上親征喀爾喀以王與禮親王代善等留守並監築遼陽都爾弼城逾月工竣改名屏城復同阿巴泰董治盛京至遼河大路廣十丈高三尺夾以壕八月授奉

命大將軍統左翼兵征明自董家口東登山毀邊
牆入掩其無備取青山營遣人約右翼兵會通州
河西越北京至涿州分兵八道右傍西山麓左沿
運河長驅並進自北京西千里內明將卒皆潰遁
略地至山西界而還復東趨臨清渡運河攻濟南
破之還略天津遷安由太平寨出青山關凡二十
餘戰皆捷克城四十餘降者六俘戶口二十五萬
有奇四年四月凱旋

賜馬五銀二萬兩五年六月同肅親王等赴明義州屯田
諭以駐營近錦州斷敵往來路至則攻克錦州城西九臺
盡刈其禾稼又攻克小凌河西二臺七月明兵五
百出錦州城夜襲我鑲藍旗營擊卻之斬八人明
總督洪承疇至寧遠分兵據杏山營城下擊敗其
騎兵獲馬七十

上遣人傳

諭曰王等但固守營壘俟敵來犯乃擊之是月敵兵千餘

出戰卻復入擊斬甚衆獲馬百餘旋復斬其出樵者八十六人又追斬明兵夜入義州戕我屯卒者九月敗敵杏山城北擊松山援兵獲馬匹甲仗六年二月攻廣寧山城擊斬松山援兵二百四十及出獵小凌河之錦州兵百七十餘是時圍錦州之王貝勒等移營去城三十里又令每旗一將校率每佐領下甲五人先歸

上遣鄭親王濟爾哈朗往代傳

諭王曰前令爾等圍錦州由遠漸近以困之今離城遠駐
致敵人田獵輓運任意往來軍律何在若久駐馬疲當
遍察以定去留仍嚴懲不善牧者乃均派遣還尤屬錯
謬其由何人倡議各指名擬罪王回奏臣因敵兵在錦
州松山杏山三城者其馬皆牧他處若彼來犯可
更番抵禦是以遣每旗官一員率每佐領下五人
還牧馬修治甲冑器械又因舊駐近城處草盡移
遠就牧皆臣倡議應治臣罪

上又遣內大臣等至遼河傳

諭曰朕愛爾過於諸子弟賚予獨厚以爾勤勞國政恪遵朕命故也今於圍敵緊要之時離城遠駐遣兵歸家何違命若此其自行議罪王奏臣識庸慮短背違

諭旨罪應死

上命降為郡王罰銀萬兩奪兩佐領戶口六月同肅親王往代鄭親王等圍錦州承疇率王撲李輔明唐通白廣思曹變蛟馬科王廷臣吳三桂八大將合兵

十三萬次松山屢迎戰王擊卻之以敵兵多請濟師

上親統大軍疾馳六日至戚家保

遣大學士剛林

諭王以立營高橋王令剛林代奏

聖駕親臨臣等勇氣增倍惟務進攻但明兵甚衆臣等屢
攻戰微有損傷若再速戰恐力不及遽立營高橋
慮敵人潛約錦州松山兩處兵夾攻請

上駐營松山杏山間

上從之自烏欣河南山至海綿亘列營明兵屢犯我鑲藍
旗鑲紅旗諸汛既敗卻伺我軍歸營輒來犯

上張黃蓋指揮布陣明將士望見皆潰遁王偕貝子洛託
等趨塔山大路橫擊之敵死者相枕藉遂攜紅衣
礮攻克塔山外四臺擒明副將王希賢等三桂樸
由杏山奔寧遠九月王還

盛京十一月往代貝勒杜度等圍錦州七年二月下

松山城承疇就擒三月克錦州大壽以城降四月
移師克塔山城殲官屬及兵七千復以馭攻杏山
城管糧官朱廷榭副將呂品竒降盡毀松山塔山
杏山三城乃班師七月敍功復爵和碩睿親王八
年八月

世祖章皇帝即位禮親王集諸王貝勒大臣議以鄭親王
與王輔政王自誓曰如不秉公輔理妄自尊大

天地譴之越日郡王阿達禮潛語王曰王正大位我當從王

貝子碩託亦言內大臣及侍衛皆從我謀王可自立王遂與禮親王發其謀阿達禮碩託並伏誅十二月同鄭親王集衆定議罷諸王貝勒貝子管理六部順治元年正月卻朝鮮國王李倧餽物告鄭親王及諸大臣曰朝鮮國王因予取江華島時全其妻子常以禮來餽較諸王獨厚向曾奏聞先帝受之今我等輔政誼無私交不當受遂定議禁外國餽送諸王貝勒是月鄭親王集內三院六部諸大

臣諭以凡政事先白王書銜名亦先之三月都統
和洛輝等訐肅親王怨王不立已語言悖妄因集
衆定讞削肅親王爵以議政大臣揚善等諂附謀
亂誅之四月

上御篤恭殿授王奉命大將軍印給

御用纛蓋

敕便宜行事率武英郡王豫郡王恭順王孔有德懷順王
耿仲明智順王尚可喜等征明師次翁後明平西

伯吳三桂自山海關書來請兵王得書即移錦州
紅衣礮向山海關復三桂書曰我國向欲與明修
好屢致書明君臣不計國家喪亂生民塗炭曾無
一言答是以整師三入蓋示意於明欲其熟籌通
好今則不復出此惟底定中原與民休息而已今
聞流賊攻陷京都崇禎帝慘亡不勝髮指用率仁
義之師沈舟破釜誓不返旌必滅賊出民水火伯
遣使致書思報主恩與流賊不共戴天誠忠臣之

義勿因向守遼東與我為敵尚復懷疑昔管仲射
桓公鈞桓公用為仲父以成霸業伯若率衆來歸
必封以故土晉為藩王國讐可報身家可保世世
子孫長享富貴師次連山三桂復遣請速進夜馳
踰寧遠次沙河距關十里三桂報賊已出邊立寨
王令諸王迎擊敗賊將唐通於一片石師至關三
桂出迎王令三桂歸營兵各以白布繫肩為識恐
與賊混致誤殺使先驅入關時李自成率賊二十

餘萬自北山橫亘至海列陣待我兵少對賊布陣不能及海岸王令曰流賊橫行久獷且衆不可輕擊吾觀其陣大相去遠首尾不能顧可鱗次集我兵對賊陣尾伺其氣衰突之必勝努力破此則大業成矣勿違節制越伍躁進陣既列令三桂兵居右翼未悉衆搏戰是日大風揚沙蔽天咫尺莫辨賊力鬪良久我軍呼噪者再風遂止從三桂陣右突出衝賊中堅萬馬騰躍飛矢雨墮自成方登高岡

觀戰知為我兵膽落急策馬下岡走我兵無不一
當百追奔四十里賊大潰遁回京都王即軍前承
制進三桂爵平西王下令關內軍人皆薙髮以馬步兵萬
隸三桂先驅追賊乃誓諸將曰此行除暴救民滅
賊安天下勿殺無辜勿掠財物勿焚廬舍不如約
者罪之仍諭官民以取殘不殺共享太平之意自
關以西各城保百姓逃竄山谷者皆還鄉里薙髮
迎降遂以捷音馳奏五月朔師次通州自成已先

一日焚宮闕載輜重西遁王令諸王同三桂各率所部追賊翼日王入京師明文武百官率軍民老幼焚香跪迎朝陽門外設故明鹵簿請乘輦王曰予法周公輔成王不當乘輦諸臣以周公負宸攝政固請王曰予來定天下不可不從衆意乃乘輦入武英殿下令安輯百姓飭將士皆乘城毋入民舍有卒屠民家犬射傷犬主斬以徇民皆安堵如故為崇禎帝發喪三日具帝禮葬歸順諸臣俱以

明原官任事武英郡王等追賊至望都自成奔西
安畿輔諸城俱納款分遣都統覺羅巴哈納石廷
柱葉臣及侍郎王鼇永等招撫山東山西河南以
京城內外經賊蹂躪鰥寡孤獨無生計者飭所司
贍養告官吏軍民曰養民之道莫大於省刑罰薄
稅斂自明季禍亂刁風日競以越訴誣告為常設
機構訟敗俗傷財心竊痛之自今嘉興維新凡五
月初二日昧爽以前罪無大小悉行宥免違諭興

訟即以所告罪罪之鬪毆婚田細事就有司告理
重大經撫按結案非機密重情毋得入京越訴訟
師誣陷良民加等反坐前朝弊政莫如加派遼餉
外又有勦餉練餉數倍正供遠者二十年近者十
餘載天下嗷嗷朝不及夕更有名買糧料諸名目
巧取殃民今與民約額賦外一切加派盡予刪除
如官吏仍混徵暗派察實治罪時明福王朱由崧
自立於江寧其大學士史可法督師揚州又設江

北四鎮沿淮徐置戍卒王欲招之降令南來副將
韓拱薇等致書可法曰予向在瀋陽即知燕京物
望咸推司馬後入關破賊得與都人士相接識介
弟於清班曾託其勒手書致表緒未審以何時得
達比聞道路紛紛多謂金陵有自立者夫君父之
讐不共戴天春秋之義有賊不討則故君不得書
葬新君不得書即位所以防亂臣賊子法至嚴也
闖賊李自成稱兵犯闕手毒君親中國臣民不聞

加遺一矢平西王吳三桂介在東陲獨效包胥之
哭

朝廷感其忠義念累世之宿好棄近日之小嫌爰整
貔貅驅除狗鼠入京之日首崇懷宗帝后謚號卜

墓山陵悉如典禮親郡王將軍以下一切故封不
加改削勲戚文武諸臣咸在朝列恩禮有加耕市
不驚秋毫無擾方擬秋高氣爽遣將西征傳檄江
南聯兵河朔陳師鞠旅戮力同心報乃君國之讐

彰我

朝廷之德豈意南州諸君子苟安旦夕弗審事機聊慕虛名頓忘實害予甚感之

國家之撫定燕都乃得之於闖賊非取之於明朝也賊毀明朝之廟主辱及先人我

國家不憚征繕之勞悉索敝賦代為雪恥孝子仁人當如何感恩圖報茲乃乘逆寇稽誅

王師暫息遂欲雄據江南坐享漁人之利揆諸情理

豈可謂平將以為天塹不能飛渡投鞭不足斷流
耶夫闖賊但為明朝崇耳未嘗得罪於我

國家也徒以薄海同讐特伸大義今若擁號稱尊便
是天有二日儼為勍敵予將簡西行之銳轉旆東
征且擬釋彼重誅命為前導夫以中華全力受制
潢池而欲以江左一隅兼支大國勝負之數無待
著龜矣予聞君子之愛人也以德細人則以姑息
諸君子果識時知命篤念故主厚愛賢王宜勸令

削號歸藩永綏福祿

朝廷當待以虞賓統承禮物帶礪山河位在諸王侯
上庶不負

朝廷伸義討賊興滅繼絕之初心至南州羣彥翩然
來儀則爾公爾侯列爵分土有平西之典例在惟
執事實圖利之輓近士大夫好高樹名義而不顧
國家之急每有大事輒同築舍昔宋人議論未定
兵已渡河可為殷鑒先生領袖名流主持至計必

能深維終始寧忍隨俗浮沈取舍從違應早審定
兵行在即可西可東南國安危在此一舉願諸君
子同以討賊為心毋貪一身瞬息之榮而重故國
無窮之禍為亂臣賊子所笑予實有厚望焉記有
之惟善人能受盡言敬布腹心佇聞明教江天在
望延跂為勞書不宣意可法旋遣人答書曰南中
向接好音法隨遣使問訊吳大將軍未敢遽通左
右非委隆誼于草莽也誠以大夫無私交春秋之

義今倥偬之際忽捧琬琰之章真不啻從天而降也循讀再三殷殷致意若以逆賊尚稽天討煩

貴國憂法且感且愧懼左右不察謂南中臣民媿安江左竟忘君父之怨敬為

貴國一詳陳之我大行皇帝敬天法祖勤政愛民真堯舜之主也以庸臣誤國致有三月十九日之事法待罪南樞救援無及師次淮上凶問遂來地圻天崩山枯海泣嗟乎人孰無君雖肆法於市朝以

為泄泄者之戒亦奚足謝先皇帝於地下哉爾時
南中臣民哀慟如喪考妣無不拊膺切齒欲悉東
南之甲立剪凶讐而二三老臣謂國破君亡宗社
為重相與迎立今上以繫中外之心今上非他神
宗之孫光宗之子而大行皇帝之兄也名正言順
天與人歸五月朔日駕臨南都萬姓夾道歡呼聲
聞數里羣臣勸進今上悲不自勝讓再讓三僅允
監國迨臣民伏闕屢請始以十五日正位南都從

前鳳集河清瑞應非一即告廟之日紫雲如蓋祝
文升霄萬目共瞻欣傳盛事大江湧出柁梓十萬
章助修宮殿豈非天意也哉越數日遂命法視師
江北刻日西征忽傳我大將吳三桂借兵

貴國破走逆成為我先皇帝后發喪成禮掃清宮闕
撫輯羣黎且罷薙髮之令示不忘本朝此等舉動
振古鑠今凡為大明臣子無不長跼北向頂禮加
額豈但如明諭所云感恩圖報已乎謹于八月薄

治筐篚遣使犒師兼欲請命鴻裁連兵西討是以
王師既發復次江淮乃辱明誨引春秋大義來相
詰責善哉乎推言之然此文為列國君薨世子應
立有賊未討不忍死其君者立說耳若夫天下共
主身殉社稷青宮皇子慘變非常而猶拘牽不即
位之文坐昧大一統之義中原鼎沸倉猝出師將
何以維繫人心號召忠義紫陽綱目踵事春秋其
間特書如莽移漢鼎光武中興丕廢山陽昭烈踐

祚懷愍亡國晉元嗣基徽欽蒙塵宋高繼統是皆
於國讐未剪之日亟正位號綱目未嘗斥為自立
率以正統與之甚至如元宗幸蜀太子即位靈武
議者疵之亦未嘗不許以行權幸其光復舊物也
本朝傳世十六正統相承自治冠帶之族繼絕存
亡仁恩遐被

貴國昔在先朝夙膺封號載在盟府寧不聞乎今痛
心本朝之難驅除亂逆可謂大義復著于春秋矣

昔契丹和宋止歲輸以金繒回紇助唐原不利其
土地況

貴國篤念世好兵以義動萬代瞻仰在此一舉若乃
乘我蒙難棄好崇讐規此幅幘為德不卒是以義
始而以利終為賊人所竊笑也

貴國豈其然往先帝軫念潢池不忍盡戮勦撫互用
貽誤至今今上天縱英明刻刻以復讐為念廟堂
之上和衷體國介冑之士飲泣枕戈忠義民兵願

為國死竊以為天亡逆闖當不越于斯時矣語曰
樹德務滋除惡務盡今逆成未服天誅諜知捲土
西秦方圖報復此不獨本朝不共戴天之恨抑亦
貴國除惡未盡之憂伏乞堅同仇之誼全始終之德
合師進討問罪秦中共梟逆賊之頭以洩敷天之
憤則

貴國義問照耀千秋本國圖報惟力是視從此兩國
世通盟好傳之無窮不亦休乎至于牛耳之盟則

本朝使臣久已在道不日抵燕秦盤盂從事矣法
北望陵廟無涕可揮身臨大戮罪當萬死所以不
即從先帝者實惟社稷之故傳曰竭股肱之力繼
之以忠貞法處今日鞠躬致命克盡臣節所以報
也惟殿下實昭鑒之書至宣付內院先是畿輔初
定王遣輔國公屯齊哈和度等迎

上駕奏言京師形勢宜建都

皇上宅中圖治宇內朝宗可慰天下仰望心至是率諸王

迎

駕於通州十月

上御皇極門

賜冊寶封叔父攝政王建碑紀績復豪格肅親王爵晉阿
濟格為英親王同三桂可喜由邊外趨綏德復多
鐸豫親王同有德仲明由河南趨西安勦賊定後
豫親王還征江南二年五月鄭親王等議定攝政
王儀制視諸王有加禮王曰

上前未敢違禮他處如議行翌日入

朝見諸臣皆跪遂回輿責大學士剛林等曰諸臣何故跪此

皇上之朝門也他處行此禮尚可乃行之

朝門豈有竟受之理其諭衆官知之御史趙開心疏言攝政王見諸臣跪迎即回因諸臣徒知尊王而不知王之尊

皇上也以叔父之親兼攝政之尊原與諸王有異然羣臣

謁王當與朝見

皇上禮不同宜明定儀制又稱號必先正名

上諭稱攝政叔父王叔父惟

皇上得稱之若臣庶皆稱則尊卑無異臣以為當於叔父

上加一皇字庶上下辨而名義定疏下禮部議行

六月豫親王克揚州可法死之遂下江寧擒由崧

於蕪湖江南平閏六月英親王勦賊至武昌東下

九江故明寧南侯左良玉之子夢庚率衆降遂班

師七月王致書豫親王曰王遣貝勒博洛等招撫
常州蘇州杭州紹興諸府降故明潞王朱常淂淮
王朱常清已悉知之大兵日久勞苦王可率諸將
士還京南京改稱江南省應天府改為江寧府王
量留兵交貝勒勒克德渾都統葉臣駐守朱氏在
任者改補他職所鑄錢留充饗洪武陵設太監四
名守陵兵四十名給地供祭祀投誠官或來京或
彼處安置王其酌行之又致書英親王曰爾等先

稱流賊盡滅李自成已死後又言戰敗賊兵凡十
三次則先稱殲賊竟屬虛語今又聞自成遁江西
爾等既稱在江西候

旨何竟啓行八月英親王還京王令停遣官出迎尋議英
親王出征時罪降郡王事具本傳十月誠浙江總
督張存仁曰各官之任曾屢飭盡忠勤職毋諂媚
餽遺本王爾為封疆大吏宜表率僚屬乃送爾本
王緞茶豈前諭未之聞耶後勿復如此是月同鄭

親王肅親王入謝

上賜良馬恩出

諭曰凡遇朝賀大典朕受王禮若此等小節無與諸王同

王奏

上年幼冲臣不敢違禮俟

上春秋鼎盛凡有

寵恩自不敢辭十二月集諸王貝勒貝子公大臣等遣人

傳語以尊崇

皇上誠諂媚已且曰

太祖

太宗所貽之業予必力圖保護俟

皇上春秋鼎盛即行歸政又曰前所以不立肅親王者非予一人意因諸王大臣皆曰若立肅親王我等皆無生理是以不立傳語畢惟豫親王不答使者還報復遣傳語曰昔

太宗賓天時予在

朝門幄中坐爾與英王跪請即尊位謂兩旗大臣屬望我者多諸親戚皆來言子時以死自誓乃已此言豈烏有耶豫親王語塞諸王請議其罪王以事在赦前且誠令自省非欲加罪免之三年正月遣肅親王征四川流賊張獻忠二月集尚書公英俄爾岱等語曰予為

上攝政惟恐事多闕誤生民失所日夜焦思又素嬰風疾勞瘁弗勝予有過毋或瞻徇其一一指陳至

國家事各有專屬戶部惟英俄爾岱內院惟范文程
剛林甯完我額色赫是賴皆當勉力勿憚勞又言
諸王均宜優養安榮其拜跪儀文殊為可省日者
肅親王出師予為祖道以金鞍良馬解贈王屈體
而受予心惻至今因欲禁此禮爾等為我善諭之
五月率諸王大臣出安定門送豫親王征蘇尼特
部諭將帥皆宜躬先臨陣奮勇破敵勿退後冒虛
名八月豫親王擊敗喀爾喀部土謝圖汗碩雷汗

凱旋王迎之烏蘭諾爾宴賚出征王貝勒及外藩
台吉等四年七月集各部尚書啓心郎等諭曰內
大臣禮部僉以豫親王功懋應進封輔政叔王子
初亦念及以王為予季弟猶豫未果今思黜陟為
國家鉅典烏容瞻顧爾等與諸王議行又誠豫親王
曰汝繼予輔政其益加勤勉尋罷鄭親王輔政復
阿濟格親王十二月以風疾不勝跪拜從諸王大
臣議元旦節

上前行禮後起立以待其進酒入班行跪禮俱停止五年
二月肅親王平四川凱旋王以肅親王徇隱隨征
護軍統領希爾根冒功事又欲擢用罪人揚善之
弟吉賽戒飭再三不引咎令諸王大臣論罪幽繫
之七月王見三桂子應熊服黃紗衣詰之乃豫親
王所與罰豫親王銀二千兩十二月大同總兵姜
瓌叛遣副都統阿喇善等助英親王圍勦六年二
月王自將征大同次固爾班口有碩雷汗下七人

來歸言碩雷汗兵馬距十日程王因出張家口趨喀爾喀行三日以馬瘠且道乏水罷仍移師討瓌三月朔次桑乾河先遣官招撫渾源州應州越數日應州從賊叅將張祖壽山陰從賊知縣顏永錫各詣軍前降師薄大同遣人諭瓌曰渾源負固不服巴克平應州山陰皆効順予今來此速開門迎降當宥爾今不降勢迫後降亦不從與其自取死亡不如速歸順瓌抗拒如故端重郡王博洛承澤

郡王碩塞復代州敬謹郡王尼堪勦賊太原率都
統阿賴等屢戰皆捷斬偽巡撫姜輝王即軍中晉
封三郡王為親王告之曰爾等向不在貴寵列子
以同係

太祖孫加錫王爵位次俸祿不得與大藩等王先歸四月
以貝子務達海鎮國公屯齊喀等征大同令英親
王還京六月英親王遣人啓王以輔政德豫親王
子不當優異鄭親王不當稱叔王而自請為叔王

王拒之曰豫王功多且舊封親王其子多爾博子
養為子多尼應襲王爵何謂優異鄭王雖叔父子
封親王亦久爾原為郡王何得妄思越分英親王
復請營府第王乃數其擅加大同衆官銜級諸罪
令後勿預部事接漢官并誡衆曰諸王及內大臣
有干預部院政事及內外漢官升降者不論言是
非即治罪予於各官應遷者遷應降者降豈如明
季偏聽人言輕為進退耶至諸王於非所屬官員

私傳至府者罪在諸王聽傳往者罪在衆官如遇
應傳之事諸王必先啓奏方許又諭禮部曰予師
行在外所出政令必關六部都察院鑾儀衛之事
原設印信不便攜行今做古制別鑄印各一加行
在二字以後差遣侍衛用鑾儀衛印七月復統師
征大同行十餘日遣護軍統領索渾希爾根助親
王滿達海勦賊寧武關獵於阿嚕什巴爾台等處
而還八月寧武關偽總兵劉偉偽道趙夢龍等降

大同偽總兵楊振威等斬環及其兄弟首獻軍前
賊黨以次削平九月一等輕車都尉希福自以奉
使外藩勞巧王優用王以其自請諭內大臣等議
罪應棄市令免死革職不許隨朝及往來諸王大
臣家十月以喀爾喀二楚呼爾嘗犯邊統師討之
徵教漢扎噶特察哈爾烏喇特土默特四子部落
各以兵會至喀屯布拉克不見賊乃班師七年二
月令部事不須題奏者付親王滿達海及瑞重親

王敬謹親王料理五月獵山海關令親王多尼順承郡王勒克德渾貝子務達海錫翰鎮國公漢岱並議政六月獵中後所議隨獵王貝勒等不整行列罪罰貝勒屯齊尚善貝子扎喀納綏有差宥親王滿達海罰申戒之七月王欲於邊外築城清暑令戶部計額徵地畝人丁數加派直隸山西浙江山東江南河南湖廣江西陝西九省銀二百四十九萬兩有奇輸工用是月

上幸王第視疾王以錫翰與內大臣席訥布庫等奏請
駕臨降罰有差八月遣禮部尚書阿哈尼堪迎朝鮮王李
暎之弟阿哈尼堪啓理部事諸王以理事官恩國
泰自代事覺議罪革阿哈尼堪職罰親王滿達海
銀三千兩降端重親王敬謹親王為郡王各罰銀
二千兩十一月王以疾偕諸王貝勒獵邊外十二
月薨於喀喇河屯年三十有九

上聞震悼

親率王貝勒大臣縞服迎奠東直門外

允議政王大臣請部院事仍令滿達海博洛尼堪三王理
之八年正月議以王嗣子多爾博襲封親王俸祿
視諸王三倍用物同

御用者撤去裁護衛百員為六十議入得

旨朕之初心本欲於攝政王歸政之後優禮酬報不意王
中道捐棄未遂朕懷今多爾博應特加恩禮所議裁去
護衛四十朕殊不忍其仍留八十員尋以王近侍蘇克

薩哈詹岱為議政大臣復博洛尼堪親王

詔各省輸助築城銀盡抵今年額徵錢糧二月蘇克薩哈
詹岱等首告王薨時其侍女吳爾庫尼將殉呼從
官羅什博爾惠蘇拜穆濟倫告以王曾製八補黃
袍令與大東珠朝珠黑貂褂潛置棺內又王欲於
永平園房以兩旗官兵移駐與都統和洛輝等共
定逆謀因出獵稽遲未行於是鄭親王濟爾哈朗
巽親王滿達海端重親王博洛敬謹親王尼堪內

大臣等疏言昔

太宗文皇帝龍馭上賓諸王大臣共矢忠誠翊戴

皇上因方在冲年令臣濟爾哈朗與睿親王多爾袞同輔政逮後多爾袞獨專威權不令濟爾哈朗預政遂以母弟多鐸為輔政叔王背誓肆行妄自尊大所用儀仗音樂衛從俱僭擬至尊造府與宮闕無異擅用織造緞疋糜庫貯金銀又構陷威逼使肅親王不得其死戶口財產不歸公俱以肥己凡一切

政事及批票本章不奉

上命概稱詔旨擅作威福任喜怒為黜陟僭妄背理不可
枚舉又不令諸王貝勒貝子公等入

朝辦事今日候府前竟以朝廷自居顯有悖逆心臣
等從前畏威吞聲今蘇克薩哈等首告逆謀詳鞠
皆實應追治其罪削爵黜宗室籍財產入官其嗣
子多爾博給信親王多尼疏入得

旨如議行十二年正月

詔內外大小官直言時政吏科副理事官彭長庚疏言從
古冲齡踐位致治太平者莫如成王之明躬任勞
怨輔成主德者莫如周公之忠然而流言一起袞
衣居東直至風雷召變金縢感悟而周公之忠益
著成王之明益彰我

朝創業

盛京諸王俱樹勲勞而睿親王之功為冠當

太宗文皇帝上賓後堅持盟誓扶立

皇上鞠躬任事此可信其忠誠者一也遇奸人煽惑離間
骨肉如郡王阿達禮貝子碩託私謀擁戴乃執大
義立置典刑史書載列昭若日星此可信其忠誠
者二也及奉

命統兵收拾明疆大權在握關內關外咸知有攝政王一
人是時

皇上冲齡遠在

盛京彼若肆然自帝誰能禁之而乃先驅綏定肅整

鑾輿恭迎

聖駕此可信其忠誠者三也是以當其初薨固無異議乃為時無幾論罪削爵毀滅過甚臣曾詢之故老聽之傳聞輒歎欷迷惑以為功多罪少應存議親議故之條若謂私匿

帝服御用等物必由彼傳諭織造早晚齋送暫停王府未可議為不軌也方今

皇上宵旰求寧而水旱頻仍似同風雷之警寬抑既久公

道宜伸乞

賜昭雪復舊封一以彰

太祖之有子

太宗之有弟

皇上開創之有臣且以見

太宗知人之明因以勵諸王作忠之氣則幽明交感災青
可弭成王周公豈得專美於前乎一等子許爾安
疏言睿親王為宗室元勳昔

太宗文皇帝任以心膂託以大事未見其不忠也我

皇上定鼎初贊輔匡襄鞠躬盡瘁撫綏中外天與人歸亦未聞有不忠也乃身歿之日羣議蜂起以天潢懿親勤勞一生竟泯沒一旦其何以慰

太宗在天之靈勵大小臣工之心昔成王感風雷之變而啓金縢周公心事始昭白千古睿親王罪固難辭功亦不可泯若宥其罪而錄其功修其墳墓俾得霑

金史紀事本末卷之四十四
恩九京則大小臣工異域窮谷無不頌我

皇上天地為心矣疏並下王大臣議鄭親王濟爾哈朗貝

勒尚善等言長庚爾安妄頌睿王元勳比擬周公
結黨煽亂應論死家產籍沒妻子為奴

詔從寬並流徙寧古塔許爾安所襲父定國世爵准定國
他子承襲乾隆三十八年二月

諭曰睿親王多爾袞當

世祖章皇帝冲齡踐阼時攝政有年威福自專不能恪盡

臣節身歿之後因其屬人首告經諸王大臣定罪除封成案具在第念我朝定鼎之初睿親王實先統衆入關肅清京輦檄定中原前勞未可盡泯今其後嗣廢絕而瑩域之在東直門外者歲久益就榛蕪亦堪憫惻著交內務府派員往視繕葺仍為量植松楸並准其近支王公等以時祭掃用昭朕篤念成勳之意

四十三年正月

諭曰睿親王多爾袞當開國時首先統衆入關掃蕩賊

氛肅清宮禁分遣諸王追殲流寇撫定疆陲一切創制規模皆所經畫尋即奉迎

世祖車駕入都定國開基以成一統之業厥功最著顧以攝政有年威福不無專擅諸王大臣未免畏而忌之遂致歿後為蘇克薩哈等所搆授款於其屬人首告誣以謀逆經諸王定罪除封其時我

世祖章皇帝實尚在冲齡未嘗親政也夫睿王果萌異志則方兵權在握何事不可為且吳三桂之所迎勝國

舊臣之所奉止知有攝政王耳其勢更無難號名即
我滿洲大臣心存忠篤者自必不肯順從然彼誠圖
為不軌無難陰鋤異己以逞逆謀乃不於彼時因利
乘便直至身後以斂服僭用明黃龍袞指為覬覦之
證有是理乎況英親王阿濟格其同母兄也於追捕
流賊回京時誑報李自成身死且不俟

旨班師睿王即遣員斥責其非免王公等往迎之禮又因
阿濟格出征時曾令巡撫李鑑釋免逮問道員及擅

至鄂爾多斯土默特取馬會議其罪降為郡王平日
辦理政務秉公持正若此是果有叛志無叛志乎又
實錄載睿王集諸王貝勒貝子公大臣等遣人傳語曰今
觀諸王貝勒大臣等但知諂媚於予未見有尊崇
皇上者予豈能容此昔

太宗升遐嗣君未立英王豫王跪請予即尊位予曰若必
如此言予即當自刎誓死不從遂奉

皇上續成大統似此危疑之日以予為君子尚不可今乃

不敬

皇上而媚予予何能容自今以後有盡忠

皇上者予用之愛之其不盡忠不敬事

皇上者雖媚予予不爾宥也且云

太宗恩育予躬所以特異於諸子弟者蓋深信諸子之成立
惟予能成立之每覽

實錄至此未嘗不為之墮淚則王之立心行事實能篤忠

蓋感

厚恩深明君臣大義尤為史冊所罕覩使王彼時如宋太宗之處心積慮則豈肯復以死固辭而不為邪說搖惑耶乃令王之身後久抱不白之寃於泉壤心甚憫焉假令王之逆跡稍有左驗削除之罪果出於我

世祖聖裁朕亦寧敢復翻成案乃實由宵小奸謀構成寃獄而王之政績載在

實錄者皆有大功而無叛逆之跡豈可不為之昭雪乎昨於乾隆三十八年因其瑩域久荒特敕量為繕葺並

准其近支祭掃然以王之生平盡心王室尚不足以
慰彼成勞朕以為應加恩復還睿親王封號追謚曰
忠補入

玉牒並令補繼襲封照親王園寢制度修其塋墓仍令太
常寺春秋致祭其原傳有未曾詳叙者並交國史館
恭照

實錄所載敬謹輯錄增補宗室王公功績傳用昭彰闡宗
勲至意於是多爾袞追復舊封配享

太廟其睿親王爵世襲罔替八月入祀

盛京賢王祠

初次襲淳穎睿忠親王多爾袞七世孫初王嗣子多爾博歸本宗

恩封多羅貝勒生蘇爾發襲固山貝子生塞勤塞勤生功宜布皆襲輔國公生如松襲多羅信郡王淳穎如松第三子也乾隆三十六年四月襲信郡王修齡所遺之輔國公四十三年正月

上既追復多爾袞舊封

命襲封和碩睿親王四十九年五月總理正紅旗覺羅

學

欽定宗室王公功績表傳卷四

欽定四庫全書

欽定宗室王公功績表傳卷五

傳三 親王

和碩豫親王多鐸傳

多鐸

太祖高皇帝第十五子初封貝勒天聰二年二月從

上征多羅特部有功

賜號額爾克楚呼爾三年十月從

上征明由龍井關入同貝勒莽古爾泰多爾袞以偏師圍
漢兒莊城降之遂會大軍克遵化進薄京城明寧
遠巡撫袁崇煥錦州總兵祖大壽以兵二萬來援
屯廣渠門外諸貝勒敗之追至壕多鐸以幼後潰
卒來犯卻之十二月旋師薊州遇明援兵自山海
關來距城二里許列陣多鐸同諸貝勒擊殲之五
年三月

命諸貝勒直言時政多鐸奏曰臣未預理刑其中公私不

得知但觀法司諸臣實心任事秉公執法者少當
令明習法律遵守成規八月從

上圍明大凌河城正白旗兵圍東北多鐸軍為策應旋同
大貝勒代善等克近城臺保九月明援兵七千出
錦州拒我前鋒軍於小凌河岸

上以兵二百馳擊敵潰遁多鐸追迫錦州墜馬馬逸入敵
陣乃乘軍校扎福塔之馬而還越十日明援兵四
萬距大凌河十五里列營多鐸從

上擊敗之十一月同貝勒濟爾哈朗往塔山東沿海截隘
俘百餘人六年五月從

上征察哈爾林丹汗遁同濟爾哈朗多爾袞等俘其衆千
餘於歸化城西南黃河岸七年六月

詔問征明及朝鮮察哈爾三者何先奏言我兵非怯關止
攻山海關外城豈可必得夫攻關外城與攻北京
城名雖不同勞苦則一宜直入關庶可壓士心成
久遠計且相機審時古語有之若緩旦夕敵漸知

備固城池修根本何隙之可乘我何愛於明祇念
士卒勞苦姑與和若時可取原不待再計至察哈
爾且勿加兵朝鮮已和勿遽絕惟先圖其大者如
蒙

天佑得之餘隨所求皆至矣八年五月從

上證明入龍門口敗明兵克保安州事詳英親王傳復畧
朔州至五臺山還從

上擊敗明兵於大同城南九年五月

上先遣諸貝勒征明山西度明必調寧遠錦州兵往援

命多鐸以軍入寧錦界牽制之遂由廣寧進以都統阿山

石建柱率兵四百前驅大壽令副將劉應選吳三

桂劉成功趙國志合錦州松山兵三千五百營大

凌河西多鐸甫過十三山站阿山等遣人以敵數

報多鐸盡率所部馳擊塵蔽天明兵驚潰我軍兩

路追擊一至錦州一至松山斬應選及軍官八人

兵五百擒遊擊曹得功等獲馬二百餘甲冑無算

翼日攻克一臺回駐廣寧邊境旬餘乃還

駕出懷遠門五里迎勞

諭嘉其初專閩外能出奇取勝

賜良馬五甲五崇德元年四月晉封和碩豫親王六月

命掌禮部事八月同睿親王多爾袞征明錦州降胡有陞

等由義州還十二月

上征朝鮮由沙河保領兵千繼前鋒軍至朝鮮國都其國

王李侗遁南漢山城進圍之其臣在外者以兵二

萬餘援城中兵亦出屢擊之捷迎

上駐城西獻所獲馬械

命分賚有差二年正月朝鮮全羅忠清兩道援兵列營南

漢山

命多鐸往視朝鮮兵拒山下敗之追奔上山值雪陰晦乃

還旦復進朝鮮兵已拔營遁收其馬千餘三年九

月

上至演武場送睿親王征明王以目疾甫愈不至

命侯睿親王班師議罪仍從

上征明錦州由蒙古托袞博倫界分道同貝子博洛率護軍及土默特兵入明境俘斬哨卒十餘攻克桑阿爾齋舊所居之大興保斬守備及壯丁二百俘其戶口道擒大壽謀二人

詔往助鄭親王濟爾哈朗軍將過中後所大壽以兵來襲傷我兵九人掠馬三十王且戰且退斬三十人夜達鄭親王營翼日合兵薄中後所城

上統師至敵不敢出四年五月議前不送出師及中後所
失士馬罪降多羅貝勒八月

命掌兵部事十月同肅親王豪格征明寧遠敗敵城北山
岡斬總兵金國鳳及其二子五年三月

命同鄭親王分統左右翼兵往義州葺城屯田逾月畢工
墾田東西四十里復同迎蒙古多羅特部蘇班岱
等降衆敗明兵

賜御旣良馬一事詳鄭獻親王傳十一月圍錦州夜伏兵

桑阿爾齋保旦敵至敗之追至塔山斬級八十餘
獲馬二十六年三月復同鄭親王圍錦州收其守
郭蒙古將諾木齊等屢敗明兵杏山松山間事俱
詳鄭獻親王傳八月明總督洪承疇以八總兵十
三萬衆來援錦州

上親統大軍臨之自

盛京馳六日環松山而營明兵震怖宵遁

上命多鐸設伏明總兵吳三桂王樸從杏山奔寧遠我前

鋒兵自杏山西逐之至高橋伏起殺敵無算九月
上旋蹕留多鐸與諸王更番圍松山城中兵夜出犯鑲黃
旗營敗之斬級千餘十二月又犯正黃旗正紅旗
營沿壕射卻之殪四百餘人七年二月明松山副
將夏承德遣通款以其子舒出質約內應夜半梯
而登生擒承疇及巡撫邱民仰總兵王廷臣曹變
蛟祖大樂等七月叙功晉封多羅豫郡王十月貝
勒阿巴泰由黃崖口征明薊州

命多鐸屯寧遠邊境以牽制明兵至則遣人入略俘百餘人敵出戰敗之多獲牲械八年四月因

聖躬違和有事祈禱疏言兵不得已而用今日之勢宜暫息兵至國中興作俟規模既定然後舉行但當以農務為急農務克勤則庶民衣食豐足衣食豐足則舉國慶豫

聖躬長享安和矣此後舉行未晚也順治元年四月隨睿親王入山海關破流賊李自成十月晉封和碩豫

親王時明福王朱由崧自立於南京設江北四鎮
扼淮徐為割據計

上命多鐸為定國大將軍統師南征值河南奏流賊肆掠
懷慶

詔先勦賊河南十二月至孟津遣護軍統領圖賴先渡河
走賊守將黃士欣等沿河十五寨保望風歸附睢
州明總兵許定國王寨首領李際遇降至陝州賊
將張有曾壁靈寶縣城外拔之進距潼關二十里

賊據山列營前鋒統領努山鄂碩等攻破之圖賴
復率騎掩殺甚衆偽汝侯劉宗敏遁二年正月賊
將劉方亮犯我營邵之自成親率步騎迎戰大軍
進擊殲其步卒賊騎奔夜屢來犯皆敗還賊鑿重
壕立堅壁大軍發巨礮進攻更疊戰方酣賊騎三百
橫衝我師貝勒尼堪貝子尚善等躍馬夾擊賊敗
衄都統恩格圖等躡之斬獲甚衆諸軍連破賊營
屍滿壕塹委軍械甲冑彌山野自成精銳略盡遁

還西安偽吳山伯馬世堯率所部七千餘衆降大
軍入關獲世堯所遣致書自成者三人並世堯斬
以徇越二日師至西安自成已先五日燬室廬挈
子女輜重出藍田口竄商州南走湖廣二月奏捷
諭嘉壯猷偉略調度有方

命以陝西事付英親王阿濟格即由河南趨淮揚討南京
之稱號自立者是月旋師河南流賊偽平南伯劉
忠迎降三月分徇南陽開封親統師趨歸德州縣

望風納款所至撫兵民設官屬疏請速鑄給印信
以防詐偽從之

詔獎方收關陝旋定中原勦寇安民勲庸茂著

賜寶飾佩刀鍍金鞵帶四月趨泗州明守將焚橋遁遂夜

渡淮直趨揚州距城二十里立營令鎮國將軍漢

岱等前趨獲船三百餘翼日薄城招諭明大學士

史可法翰林學士衛允文等降不從攻七日克其

城擒斬之五月師至揚子江北岸明鎮海伯鄭鴻逵

等以水師分守瓜州儀真我軍左右對敵列營相持三日造船二百餘留左翼兵駐江北岸遣鎮國將軍拜音圖等直渡江副都統李率泰引大軍以次渡福王聞揚州失守遁太平大軍至南京明忻城伯趙之龍魏國公徐州爵大學士王鐸禮部尚書錢謙益等迎降收文武官數百負馬步兵二十三萬有奇王入駐城中安撫居民令投誠軍悉歸伍遣貝勒尼堪貝子屯齊等追福王於太平復走

蕪湖欲渡江圖賴等邀之江口明靖國公黃得功迎戰敗中流矢死總兵田雄馬得功縛福王及其妃歸我軍

諭嘉王與諸臣同心協力克奏膚功遣侍衛赴軍勞之初福王走太平其大學士馬士英挾福王母南走杭州議奉潞王朱常澆拒守六月貝勒博洛等趨杭州士英迎戰敗渡錢塘江逃常澆率衆降淮王朱常清亦自紹興來降浙東西悉歸順王承

制改南京為江南省疏授江寧巡撫安慶巡撫以下官三百七十三人有偽稱杜陽王煽亂廬江和州間者遣總兵吳勝兆等勦平之尋奉

詔俟貝勒勒克德渾至江寧俘福王等還京十月凱旋上行郊勞禮於南苑晉封和碩德豫親王

賜黑狐帽紫貂朝服金五千兩銀五萬兩馬十鞍二三年五月蘇尼特部騰機思騰機特等叛奔喀爾喀

詔集外藩諸蒙古兵於克魯倫河以多鐸為揚威大將軍

同承澤郡王碩塞統師追勦七月師至盈阿爾察
克山聞騰機思在袞噶嚕台星夜疾進三日敗賊
於諤特克山斬台吉茂海渡圖拉河追至布爾哈
圖山斬騰機特子二騰機思孫三及喀爾喀台吉
十三人盡獲其家口輜重師次扎濟布喇克喀爾
喀土謝圖汗兩子以兵二萬碩雷汗子以兵三萬兩
路迎戰我師奮擊大捷追奔三十餘里先後斬級
數千俘千餘人獲馳千九百馬二萬一千一百牛

萬六千九百羊十三萬五千三百有奇十月凱旋
上出安定門迎勞宴之所獲牲畜志

頒賚將士加

賜王鞍馬一四年七月晉封輔政叔德豫親王

賜金千兩銀萬兩鞍馬二增

冊文稱定鼎中原以來所建功勲卓越等倫云六年三月

薨年三十有六立碑紀功九年三月鄭親王濟爾

哈朗等議多爾袞既削封爵多鐸係其母弟應追

降郡王從之康熙十年六月追諡曰通乾隆四十三年正月

諭廷臣曰豫親王多鐸從睿親王入關肅清京輦即率師西平流寇南定江浙實為開國諸王戰功之最乃以睿親王之誣獄株連降其親王之爵其後又改封信郡王雖至今承襲罔替但以王之勛績超邁等倫自應世胄原封以彰殊眷豈可以風影微青輒加貶

易

命追復親王及封號並配饗

太廟八月入祀

盛京賢王祠

初次襲多尼豫通親王多鐸第二子崇德七年七月封多羅郡王順治六年十月襲封和碩親王七年五月預議政八年二月加號曰信九年三月追降多鐸為郡王多尼亦降多羅信郡王罷議政十月復議政十五年正月

上命多尼為安遠靖寇大將軍偕平郡王羅科鐸貝勒尚
善杜蘭等征明桂王朱由榔與四川廣西兩路軍
會期進取九月由湖南入貴州會平越十一月由
貴陽趨安莊衛由榔之晉王李定國焚磨盤江鐵
索橋遁十二月大軍以浮橋濟遂自交水至松嶺
衛擊走其鞏昌王白文選十六年正月薄雲南省
城定國文選挾由榔奔永昌王入城駐守令貝勒
尚善等由鎮南州克永昌府及騰越州六月以王

跋涉險阻經歷寒暑傳

諭慰勞

賜御衣一蟒袍一及鞍馬弓矢等物十七年五月凱旋

上遣內大臣迎勞六月追論在雲南時誤坐前鋒統領瑚

哩布等磨盤山敗績罪罰鍰十八年正月薨年二

十有六謚曰宣和

二次襲鄂扎信宣和郡王多尼第二子順治十八

年六月襲封多羅信郡王康熙十四年三月察哈

爾布爾尼叛

上命鄂扎為撫遠大將軍往討以大學士圖海副之瀕行諭曰大兵出山海關當宣布累朝待布爾尼厚恩及朕不忍加誅之意彼若悔罪來歸則已否則以敕書付縱還蒙古持往諭之即布爾尼等臨陣來降亦當保全恩養四月軍次岐爾哈台偵賊屯達祿王留輜重與圖海及副都統烏丹等輕騎前布爾尼設伏列陣待王分布滿洲蒙古兵山澗間賊伏發撓我土默特

兵破之布爾尼列火器以拒大軍奮擊賊大敗復
收潰卒戰幾殲之獲馬械無算布爾尼偕弟羅布
藏以三十騎遁至扎魯特境貴勒蘇台為科爾沁
赴調之部長沙津射殪察哈爾平王招撫餘黨千
三百餘戶閏五月師旋

上迎勞於南苑

諭褒以遠行征討建立大功

賜金百兩銀五千兩二十四年十二月掌宗人府事二十

九年七月噶爾丹深入烏珠穆沁

上命恭親王常寧為安北大將軍鄂扎副之三十五年二

月

上親征噶爾丹以王統領正白旗營三十八年十二月以

情解宗人府任四十一年十月薨年四十有八

三次襲洞鄂豫通親王多鐸第七子順治十八年

正月封多羅貝勒康熙十三年四川叛應逆藩吳

三桂

上命洞鄂為定西大將軍同貝子溫齊輔國公綽克托討
之師由陝西進將抵略陽陝西提督王輔臣叛於
寧羌州洞鄂以道阻退次漢中留將軍錫卜臣等
駐守自引兵出棧道由鳳縣至鳳翔復留副都統
赫業等駐守身率餘兵回西安十四年正月

上諭廷臣曰蘭州近邊要地應速遣兵駐守今保寧大兵
已回西安達禮善巴圖魯兵亦將至西安其撥西安現
在兵每佐領下四五名赴蘭州勦禦逸賊洞鄂疏言蘭

州固宜遣防但保寧還卒鎧甲未備達禮善巴圖魯兵兼程來恐難驟遣若以西安兵往恐輔臣由陳倉諸路斷我棧道自秦州平涼來逼深為可虞又疏言興安兵變殺總兵王懷忠臣等出示安撫仍止前往興安之副都統穆舒渾兵

上敕撫慰興安又

諭洞鄂曰陝西重地棧道關係尤急沔州秦州乃通漢中要路其若何據守保固與總督等會議務期萬全時鳳

縣賊毀偏橋守隘阻運輔臣所部王好文等復斷
棧道二月

諭責洞鄂等退縮遲延致狡寇阻截仍

嚴飭往定平涼秦州諸路於是將軍阿密達署副都統鄂
克濟哈等率所調與京兵西安兵往平涼洞鄂與
溫齊綽克托等率回自保寧及達禮善巴圖魯兵
往秦州是月賊陷蘭州

敕兩路兵速進洞鄂至隴州經仙逸關偽總兵高鼎蔡元

拒關山河岸洞鄂與署前鋒統領穆占西安將軍
佛尼勒等分布前後隊先遣都統赫業為奇兵應
援合力衝擊賊敗遁獲馬械無算進復關山關追
擊五十里三月大軍次渭河奪其橋圍秦州四月
四川平涼諸賊萬餘來援屯南山城內突出賊八
千餘分擊敗之克東西兩關屢敗賊陣斬偽總兵
何隆李國棟招撫偽文武官二百二十餘兵八千
四百餘安輯民人九萬有奇復秦州佛尼勒等追

勦至閻關賊迎戰敗之復禮縣追賊至西和殺千餘人陣斬偽官三十清水伏羌俱平捷

聞

詔嘉獎六月復遣安西將軍穆占復鞏昌偽總兵趙士昇以蘭州降七月

上諭洞鄂曰國家仰荷

天眷秦州鞏昌蘭州等處漸次恢復朕甚嘉悅此係保寧還旆之兵間關跋涉戮力効命所致須不時存念恤其

勞苦非緊要必節其勞無大過則寬其罰爾等將兵在外事情經練頗多必能同寅協恭折衷而行但相隔遼遠意慮所及不得不為告誡秦地實為形勝要區今將軍提督總兵及投誠兵衆雲屯一處將軍張勇勞績甚多恐貝勒等藐忽視之生彼憤懣時屢朕懷貝勒等既効勤勞底定秦省務期克奏全功以慰朕望八月招撫歸川十二保偽叅將普國祥及兵千餘與將軍畢力克圖阿密達會平涼賊出戰擊斬偽總兵郝天

祥斃賊無算九月遣副都統鄂泰阿爾琥敗賊於
寶雞縣羊添池山焚其營十二月疏言大兵攻平
涼克取第一關廂距城三里許對南山屯營欲進
薄城因溝深地險難下壘故未能即下

諭宜斷賊餉道以困之十五年二月

諭兵部曰大將軍貝勒洞鄂等屯兵平涼日久賊寇尚未
勦滅城池尚未恢復夫秦省不能即定川賊尚在窺伺
者皆由王輔臣未勦滅平涼未克取故也其以都統大

學士圖海為撫遠大將軍亟赴陝西勦滅逆孽其貝勒
洞鄂以下悉聽大將軍節制是月疏言聞逆賊將斷關
山擬遣兵往守但現在兵少難分至鞏昌雖有副
都統翁愛率兵前赴而賊逼可虞

命將軍錫卜臣等調兵守關山張勇等堵勦出犯秦鞏之
賊十六年二月

上以洞鄂統兵出征殊負委託削貝勒爵三十一年九月
任正藍旗滿洲都統四十二年三月襲封多羅信

卷五
郡王四十五年七月薨年六十禮部請卹

諭廷臣曰洞鄂補授都統襲封王爵以來並無感恩効力之處且原係軍政問罪之人不准賜卹其王爵亦當論嫡長所生應以前信郡王鄂扎之子德昭襲

四次襲德昭信郡王鄂扎第五子康熙四十五年七月襲封多羅信郡王雍正二年十一月授宗人府左宗正四年八月

命管正白旗事務五年十一月轉右宗正乾隆二十七年

二月薨年六十有三諡曰愨

五次襲如松豫通親王多鐸六世孫初王第三子
多爾博出為睿忠親王後睿忠親王被罪未及襲
還本宗封多羅貝勒多爾博生蘇爾發襲固山貝
子生塞勤塞勤生功宜布皆襲輔國公如松功宜
布第三子也乾隆十一年六月襲父爵輔國公二
十七年七月任

乾清門散秩大臣二十一年四月管健銳營事六月

署鑲黃旗滿洲副都統二十二年正月署領侍衛
內大臣尋授宗人府右宗人二月授兵部侍郎四
月授鑲紅旗滿洲副都統二十三年二月調正黃
旗滿洲副都統九月遷正黃旗漢軍都統二十四
年六月轉左宗人九月署兵部尚書十二月授領
侍衛內大臣二十五年十月授綏遠城將軍二十
六年十一月調西安將軍二十七年閏五月襲封
多羅信郡王八月授正藍旗蒙古都統九月署領

侍衛內大臣二十八年七月授右宗正十月管理
宗人府銀庫事三十年十一月以縱輿夫開博場
應革爵得

旨寬免在閒散王上行走如松請歲繳王俸五千兩贖
罪宗人府議不足蔽辜應革爵

命照如松請仍免革爵三十五年十一月薨年三十有
四諡曰恪

六次襲修齡信懋郡王德昭第十五子乾隆二十

七年六月襲如松所遺之輔國公三十年十二月
授散秩大臣三十四年十月授宗人府右宗人十二
任正白旗滿洲副都統三十五年正月調鑲紅旗滿
洲副都統五月轉左宗人閏五月調正紅旗漢軍
副都統三十六年四月襲封多羅信郡王四月授
左宗正三十七年三月總理鑲白旗覺羅學四十
三年正月

命復豫通親王始封爵號晉襲和碩豫親王四月任正

白旗蒙古都統四十八年十月授盟長十一月掌
宗人府事四十九年閏三月調鑲藍旗滿洲都統
五十一年三月薨年三十有八謚曰良

七次襲裕豐豫良親王修齡第一子乾隆五十一年
十月襲封和碩豫親王

| | | | | | | | | |
|--|--|--|--|--|--|--|--|--|
| | | | | | | | | |
|--|--|--|--|--|--|--|--|--|

和碩肅親王豪格傳

豪格

太宗文皇帝第一子初從征蒙古棟夔察哈爾鄂爾多斯
諸部有功封貝勒天命十一年十月同大貝勒代
善等征克扎嚕特部天聰元年五月

上征明豪格同貝勒德格類等敗明兵于錦州復率偏師
衛塔山糧運遇明兵二萬我前軍八十人擊卻之
二年五月同貝勒濟爾哈朗征蒙古固特塔布囊

誅之收其衆三年十月

上征明

命同三貝勒莽古爾泰等赴通州視渡口捕哨卒大軍由
通州薄京城豪格迎擊明寧錦援兵于廣渠門外
敵重兵右伏莽古爾泰令諸貝勒擊其右避敵者
罪豪格獨如命衝殺至壕敵大潰十二月同貝勒
岳託薩哈璘圍永平府別攻香河縣克之四年正
月同岳託守瀋陽五年三月

命諸貝勒直言時政豪格奏曰臣願竭忠為國遇征伐不
辭勞瘁以圖報稱七月

上統師攻明大凌河城豪格與貝勒杜度等居守六年五
月從

上征察哈爾林丹汗遁移師略歸化城諸路六月晉封和
碩貝勒七年六月

詔問征明與朝鮮察哈爾三者何先奏言我征明如徒得
錦州餘壁不下恐曠日老我師今宜悉我衆及

邊外新舊蒙古從舊道入頒示屯寨告以我願和而明不肯彼民身被創殘將自怨其主我勇氣自倍矣再用更番法俟馬肥益以漢兵巨礮一從寧遠一從舊路入夾攻山海關得之則已不得屯兵彼地遣人招諭流賊來歸不然駐師通州偵流賊情形彼方分兵禦我俟其懈襲之至朝鮮且暫行撫慰察哈爾如近我境則相機而行遠則且緩圖也八月與貝勒阿巴泰等略明山海關俘獲戶

口牲畜四千有奇八年七月

上親統大軍証明由宣府趨朔州豪格偕額駙揚古利毀
邊牆大兵遂由尚方保分道進八月同貝勒多爾
袞略朔州及五臺山還從

上視大同城擊敗明援兵九年二月

命同多爾袞岳託薩哈璘統兵收察哈爾林丹汗子額哲
受其降師還抵歸化城岳託以疾留豪格同諸貝
勒略明山西州縣敗明兵遂會岳託于歸化城班

師事詳審忠親王傳崇德元年四月晉封和碩肅

親王六月

命掌戶部事尋坐黨岳託且漏

上言有怨心降貝勒解部任罰鍰八月同睿親王多爾袞
攻明錦州降胡有陞等十一月

命仍攝戶部十二月從

上征朝鮮同睿親王統滿洲蒙古及外藩蒙古各左翼兵
別從寬甸入二年正月入長山口昌州民不能禦

奔山立寨攻克之敗安州黃州兵五百于寧邊城
下擒其總兵寧邊帥復率兵來援遣蒙古都統蘇
納等敗擒之師次宣屯村村民言黃州帥聞其王
被圍率兵萬五千往援行三日矣我軍疾馳一晝
夜追及于陶山敗之九月以都統鄂莫克圖欲脅
取蒙古台吉博洛女以媚豪格豪格不治鄂莫克
圖罪議罷部任罰鍰三年九月征明自董家口毀
邊墻入敗明兵于豐潤縣遂下山東降高唐州略

地至曹州明兵毀橋拒我師列陣誘敵潛渡遶其
後敗之還下東光縣又遣騎二千敗郭太監兵於
滹沱河破獻縣四年四月凱旋

賜馬二銀萬兩八月

命仍攝戶部九月復原封十月同貝勒多鐸證明寧遠敗
之北山岡五年六月同睿親王等屯田義州刈其
禾稼屢敗明兵克其臺卻其總督洪承疇之衆十
二月

命同睿親王圍錦州嗣以我軍離城遠駐又遣弁兵私回
議罪與睿親王並降郡王六年六月同睿郡王多
爾袞代鄭親王濟爾哈朗等圍錦州屢捷擊敗承
疇之卒十三萬九月還

盛京事俱詳睿忠親王傳十一月

命同輔國公滿達海圍松山七年二月明松山副將夏承
德內應擒承疇及巡撫總兵等斬兵備道副將遊
擊等官百餘兵三千六十有奇事具豫通親王傳

三月駐杏山斬明兵出薪者三十餘人又遣前鋒
努山擊敗明兵欲入寧遠者五百餘人四月同鄭
親王攻塔山克之七月敎功復原封

賜鞍馬一蟒緞百順治元年四月以語侵睿親王為都統
和洛輝等所訐削爵十月

上大封諸王念豪格從定中原有功仍復原封是冬

命征山東土寇至則定濟寧破滿家洞等賊巢堙二百五

十一洞土寇平三年正月

命為靖遠大將軍同行禧郡王羅洛渾貝勒尼堪等西征
三月抵西安遣尚書星訥等勦賊於邠州宋大傑
賀洪器齊勲張國棟降復遣都統都類勦賊于慶
陽斬石二五月賊渠劉文炳康千總郭天星等迎
拒擊之斬康千總時賊渠賀珍二隻虎孫守法據
漢中興安武大定高如礪蔣登雷石國璽王可成
周克德據徽縣階州大軍自西安進分兵奮擊降
登雷國璽可成克德餘潰遁復所陷州縣陝西平

十一月入蜀至南部偵賊張獻忠據西充縣令護
軍統領鰲拜先發大軍夜繼進詰旦抵西充獻忠
悉衆來拒大破之斬獻忠于陣分兵克賊營百三
十餘斬數萬級捷

聞得

旨嘉獎四年八月奏分定諸郡縣蜀寇悉平五年二月凱
旋

上御太和殿宴勞三月睿親王以豪格狗隱隨征護軍叅

領希爾根冒功事又欲擢用罪人揚善之弟吉賽
議罪削爵繫之卒于獄八年正月

上親征念其枉復封和碩肅親王立碑表之十三年九月
追謚武再立碑以紀其功乾隆四十三年正月

上追念肅親王忠勳

命配享

太廟其現襲之顯親王復封號曰肅八月入祀

盛京賢王祠

初次襲富綬肅武親王豪格第四子順治八年二月襲封和碩親王改號曰顯尋預議政康熙八年十二月薨年二十有七謚曰懿

二次襲丹臻顯懿親王富綬第四子康熙九年六月襲封和碩顯親王三十五年二月從

上征噶爾丹同副都統禪穆布等統領正藍旗營四十一年五月薨年三十有八謚曰密

三次襲衍潢顯密親王丹臻第六子康熙四十一年

年八月襲封和碩顯親王乾隆元年二月總理鑲
白旗覺羅學三十六年十二月薨年八十有二謚
曰謹

四次襲蘊著顯懿親王富綬孫輔國將軍拜察禮
第三子康熙四十七年十二月封三等奉國將軍
乾隆七年六月授內閣侍讀學士十年二月遷通
政使十一月遷

盛京戶部侍郎十二年五月調兵部侍郎尋任鑲黃

旗滿洲副都統九月授漕運總督十四年四月以受商人程志仁等餽遺又稱奉

旨嚴查鹽政吉慶私產狡詐乖張擬絞監候嗣

恩釋二十年十一月授鑲白旗漢軍副都統二十一年

八月調右衛副都統二十三年八月授涼州將軍

二十七年正月調綏遠城將軍二十八年三月攝

歸化城都統事三十年十二月授工部尚書三十

一年正月預議政尋充

經筵講官二月管會同四譯館三十二年三月因工
部派辦溝渠工程不公降二級調用三十七年四
月襲封和碩顯親王五月授鑲藍旗滿洲都統三
十八年閏三月總理鑲藍旗覺羅學四十三年正
月

命復肅武親王始封之號仍為肅親王四月薨年八十
謚曰勤

五次襲永錫顯密親王丹臻孫奉國將軍成信第

五子乾隆三十三年十一月授三等侍衛四十三
年閏六月襲封和碩肅親王四十九年六月總理

正黃旗覺羅學

和碩承澤親王碩塞傳

碩塞

太宗文皇帝第五子順治元年十月封多羅承澤郡王時
流賊李自成奔潼關河南仍為賊守十二月隨豫
親王多鐸出征有功事具豫通親王傳二年二月
還師河南尋隨豫親王征明福王朱由崧於南京
四月

賜團龍紗衣一襲五月克南京福王就俘凱旋

賜金二千兩銀二萬兩三年五月蘇尼特部叛奔喀爾喀
隨豫親王往勦亦有功七月敗喀爾喀土謝圖汗
碩雷汗兵五年八月同英親王阿濟格等勦天津
土寇十一月喀爾喀行獵近邊同英親王戍大同
會總兵姜瓖叛王堅守汛地賊至麾兵掩殺之六
年正月援代州走賊黨劉遷賊又於助馬得勝路
立兩營以拒王親督戰敗之三月睿親王多爾袞
赴大同招撫瓖承

制晉碩塞為親王七年八月以和碩親王之下多羅郡王
之上無止稱親王例仍改為多羅郡王八年閏二
月晉封和碩承澤親王三月掌兵部事十月預議
政十一年十一月掌宗人府事十二月薨年二十
有七康熙十年六月追諡曰裕

初次襲博果鐸承澤裕親王碩塞第一子順治十
二年六月襲封和碩親王改號曰莊雍正元年正
月薨年七十有四諡曰靖無嗣

二次襲允祿

聖祖仁皇帝第十六子康熙六十一年十一月任內務府

總管雍正元年二月

命為博果鐸後襲封和碩莊親王二年十一月掌宗人府

事七年二月任正紅旗漢軍都統七月調鑲白旗

滿洲都統十年八月調正黃旗滿洲都統

今上御極

命總理事務兼掌工部食親王雙俸王承

聖祖仁皇帝指授精於天文算法預修數理精蘊至是充

增修七政時憲書總裁又修律呂正義後編

御製序稱其貫徹樂義乾隆二年十二月以總理事務

得優叙

賜一等奉恩鎮國公並

允王請以承澤裕親王曾孫寧赫襲三年二月任理藩

院尚書尋充

玉牒館總裁四年十月議王與弘哲往來黨私應削爵得

旨寬免裁親王雙倅罷理藩院尚書任十二月復以王

私抵官物應削爵

詔仍免之罰親王倅五年六年十二月

旨免罰倅七年六月總理樂部事二十九年六月王七

十誕辰

賜詩有近尊行裏無雙老闔藩衛中有數賢之句三十

二年二月薨年七十有三諡曰恪

三次襲永瑞莊恪親王允祿孫奉恩輔國公弘普

第一子乾隆八年七月襲父爵奉恩輔國公二十一年四月管健銳營事二十二年正月署鑾儀衛事七月任鑲黃旗滿洲副都統二十六年二月調鑲黃旗漢軍副都統三十二年六月襲封和碩莊親王尋任鑲紅旗蒙古都統十月總理樂部事三十四年十月總理正藍旗覺羅學三十八年九月署領侍衛內大臣十月授盟長十一月掌宗人府事三十九年九月總理左右翼宗學四十一年十

一月充

玉牒館總裁四十二年六月調正紅旗滿洲都統五十三年二月薨年五十有二謚曰慎

四次襲綿課莊慎親王永瑋弟奉國將軍永珂
第一子乾隆五十三年五月襲封和碩莊親王

欽定宗室王公功績表傳卷五